



Lavin, il lieu da mastralia tradiziunal dal circul Sur Tasna.



Ardez cun la ruina da Steinsberg.

Lavin, Guarda ed Ardez

Chasas engiadinaisas e fatschas dal vitg bain mantegnidas

■ **Las vischnancas da Lavin, Guarda ed Ardez en situadas en l'Engiadina Bassa, en la part inferiura dal circul Sur Tasna. Tuts trais vitgs en caracterisads da numerusas chasas engiadinaisas tradiziunalas.** Enconuscent è daventà en spezial il maletg dal vitg da Guarda ch'è vegnì renovà ils onns 1939–45. A partir dal 2015 fan Guarda ed Ardez – ensem cun Ftan, Sent, Scuol e Tarasp – part da la nova vischnanca da Scuol che vegn a furmar la pli gronda vischnanca da la Svizra.

Lavin

Vischnanca politica, circul Sur Tasna, district En. Vitg lung la via situà a la riva sanestra da l'En, lieu da mastralia dal circul. 12avel tschientaner *Lavinis*. 1835 359 abitants; 1850 367; 1900 249; 1950 242; 1970 155; 1990 184; 2000 174. Abitadi dal temp da bronz mesaun sin Las Muot-tas. Lavin è attestà sco vitg cumpact pir en il 13avel e 14avel tschientaner. La fracziun da Gonda, menziunada già vers il 1160, è vegnida bandunada en il 17avel tschientaner (ruina restaurada dapi il 1983). Sin il plaun ecclesiastic ha Lavin dependì d'Ardez fin il 1325, alura è la vischnanca s'unida cun Susch e dapi il 1422 furma ella in'atgna plaiv. Il 1529 ha Philipp Gallicius introduci la reformaziun a Lavin. Vers il 1500 è vegnida construìda la baselgia actuala, ornada cun picturas remartgablhas en stil gotic tardiv, messas a la glisch il 1955–56. Il vitg è vegnì destrui da truppas austriacas il 1499 ed il 1622. Suentar la liberaziun da l'Austria (1652) ha Lavin fatg part dal cumin da Sut Tasna fin il 1851. En il temp modern è stada las funtaunas da gudogn da la regiun l'allevament da muvel, la cultivaziun da granezza, l'export da laina ed il servetsch mercenar. Lung l'aula Lavinuoz è naschids manaschis industrials ed implants per elavurar ils minerals d'arom, explotads en il 18avel tschientaner. L'incendi dal 1869 ha destrui 136 edifizis (68 chasas) ch'èn vegnids reconstruìds mo per part, quai che caracterisescha anc oz il maletg dal vitg. Staziun da la Viefier retica 1913. Sviamment dapi il 1971. Il portal sid dal tunnel dal Veraina, avert il 1999 cun ina staziun per il transport dad autos, sa chatta sin il territori da Lavin. Il 2000 eran occupadas 58 % da las persunas cun activitad da gudogn a Lavin en il sectur terziar. Part da la populaziun da lingua rumantscha: 2000 75,9% / 85,6% (meglra lingua / tuttas indicaziuns). *Paul Eugen Grimm*

Gonda

Anteriura fracziun da la vischnanca da Lavin, situada a 1500 m tranter Lavin e Guarda a la veglia via romana e medievala. Attestada per l'emprima giada enturn il 1160 sco culegna. Ils possessurs da terren ils pli impurtants a Gonda eran en il temp medieval ils chastellans von Matsch e l'investg da Cuiira. Il 1545 è Gonda documentà sco fracziun da Lavin; il 1573 è l'abitadi daventà victima d'in grond incendi. Devastaziun e sblundregiada tras las truppas austriacas dad Alois Baldirun



Balcun tort caracteristic a Guarda.

FOTO CLAUDIA HULDI / PIXELIO

(1621–23) ch'han probablmain accelerà la decadenza da Gonda. En sia «Einfalte Delineation aller Gemeinden gemeiner dreyen Bünden» (1742) descriva Nicolin Sererhard «Ganda» sco «Nachbarschäftlin» da Lavin, in abitadi già dadit bandunà e nunabità. Las exchavaziuns interprendidas dapi il 1983, promovidas e per part era finanziadas da la Fundaziun Pro Gonda/Lavin, han purtà a la glisch las ruinas da diesch chasas e quella da la baselgia dal 13avel tschientaner, consecrada als ss. Baltramieu e Flurin. *Adolf Collenberg*

Guarda

Vischnanca politica, circul Sur Tasna, district En, construìda lung la via sin ina terrassa a sanestra da l'En, cun la fracziun da Garsun situada en il fund da la val. 1160 *Warda*. 1850 280 abitants; 1900 245; 1950 193; 1980 134; 1990 165; 2000 144. Il rempar da crappa da Patnal date-scha eventualmain dal temp da fier. En il temp autmedieval era Guarda in aclaun. Il 1494 è Guarda sa separà ecclesiasticamain d'Ardez. Da quel temp è probablmain era vegnida construìda la baselgia gotica. Il 1529 ha Guarda aderi a la reformaziun, ensem cun Lavin. L'acclaun d'Auasagna (oz bandunà) è attestà en il 16avel tschientaner sco funtauna termala. Guarda è vegnì destrui duas giadas (1499 e 1622); il 1652 è la vischnanca sa cumprada libra da l'Austria ed è daventada il 1854 ina vischnanca autonoma. Cun la construcziun da la via en il fund da la val (1862) è era il progress economic passà per gronda part speravi a la vischnanca. Per quella raschun e grazia ad ina restauraziun cumplessiva (1939–45) è Guarda restada ina da las vischnancas engiadinaisas las pli bain mantegnidas. Il

1975 ha ella survegnì il Premi Wakker ed il maletg dal vitg è vegnì classificat il 1985 sco d'impurtanza naziunala. Il 1913 è vegnida construìda la staziun da la Viefier retica a Garsun. Dapi ca. 1950 sa basa l'agricultura quasi exclusivamain sin l'allevament da muvel. Part da la populaziun da lingua rumantscha: 2000 62,5% / 78,5% (meglra lingua / tuttas indicaziuns). *Paul Eugen Grimm*

Jachen Ulrich Könz

* 20 da favrer 1899 ad Arezzo, † 25 da december 1980 a Samedan, reformà, da Guarda ed Ardez. Figl da Peider, commerciant, e da Constanza nata Vital. Biadi da Jachen Ulrich. ∞ 1) Dora nata Geer, 2) 1939 Selina nata Meyer (Selina Chönz). Maturitad a Cuiira, studi d'architettura a la Scola politecnica federala (SPF) a Turitg ed a la Scola auta da tecnica a Stuttgart, diplom da la SPF 1921. Praticum en Frantscha e viadis da studi en l'Italia. Agen biro a Tavau 1926–27, alura a Zuoz ed a partir dal 1939 a Guarda. Landamma dal circul da Sur Tasna, president communal da Guarda, commember da la cumissiun grischuna per la protecziun da la natira e da la patria e supstant da la secziun grischuna da la Societad dals picturs, sculpturs ed architects svizzers. Könz è daventà enconuscent surtut sco architect engaschà en la tgrira da monuments. El ha gidà a reconstruir las chasas destruidas d'incendis a Sent (1921) ed a Susch (1925). Menziun speziala tranter ils edifizis restaurads da Könz meritan las baselgias parochialas da Zuoz (1918) e Guarda (1932–33), la Ciàsa Granda a Stampa (1953–56) ed il Chastè da Planta-Wildenberg a Zernez (1957). S'ovra principala è stada la restauraziun

totala da Guarda (1939–45). En ses edifizis novs ha Könz tschertgà ina sintesa tranter l'architettura moderna e quella tradiziunala engiadinaisa che sa manifestescha per exempel en las chasas-atelier da Turo Pedretti a Samedan (1946, destrui il 1951 da la lavina) e Schlarigna (1951), en la Chesa Flurina a Samedan (1964) ed en l'antieriura Chasa dal Parc Naziunal a Zernez (1968). Il svilup architectonic general dals onns tschuncanta s'exprima en la centrala da las Ovras electricas Val-Zervreila (1953–58). President da l'Uniuin dals Grischs 1942–45. Premio per l'architettura e l'urbanistica montana da l'Universitad da Turin 1954, Premi cultural dal Center da cultura Laudinella San Murezzan 1978. *Leza Dosch*

Bos-cha

Aclaun da la vischnanca d'Ardez a 1664 m, a la via (medievala) da Guarda ad Ardez. Il 1536 è attestad in Claot, in Nutt ed ina Ursina da *Boschka* cun possess a Bos-cha. Il num Bos-cha deriva dal german Bosk, rumantsch chaglia. Il 1521 è menziunada ina chaplutta da S. Streivan a Bos-cha, bandunada anc en il 16avel tschientaner. Il chaplon tgrava a medem temp era la chaplutta da S. Luzi sin il chastè da Steinsberg/Ardez. Quella è vegnida integrada enturn il 1570 en ina chasa (arsa giu il 1931) che sa chattava al lieu da la Chasa Craista odierna. Tenor ils tschentaments d'Ardez dal 1697 aveva Bos-cha in agen funcziunari per tscherts uffizis, per exempel per survegliar ils implants da sauaziun (*auguer da commün*). La Chasa Viletta a Bos-cha, construìda enturn il 1830, è ina chasa burgaisa remartgablha cun ina culmaina artgada singulera. *Martin Bundi*

Ardez

Vischnanca politica, circul Sur Tasna, district En, situada da la vart sanestra da l'En, cun Bos-cha e Sur En. Ca. 840 *Ardezis*, fin en il 19avel tschientaner uffizial Steinsberg, 1850 586 abitants; 1900 612; 1910 1 005 (construcziun da la Viefier retica); 1950 541; 2000 401. A Bos-cha han ins chattà craps-scalutta dal temp preistoric (craps da strias), a Chanoua cheramica da la Cultura da Fritzens-Sanzeno. Suotchastè è stà colonisà, tenor perscrutaziuns, senz'interrupziun dal temp da bronz tardiv (Cultura da Melau) al temp da fier tempriv (Cultura da Fritzens-Sanzeno), singuls chats dateschan era dal temp roman. Dal 1161–1310 è documentads signurs *de Ardetz*. Ils signurs sin il chastè da Tarasp, la claustra da Mariamunt, l'investgju da Cuiira, il contadi dal Tirol ed ils signurs de Matsch avevan possess e dretgs ad Ardez. Il chastè da Sasmunt, oriundamain ina fortezza cun baselgia (S. Gliezi, restaurada il 1985), a partir dal 12avel tschientaner sedia feudala, è passà tras cumpra a l'investg da Cuiira avant il 1209, furmond dapi alura il center dal domini episcopal. El è vegnì destrui il 1499, ensem cun la vischnanca d'Ardez, en la Guerra svabaisa (tur restaurada pliras giadas). La veglia plaiv d'Ardez cumpigliava, sper Guarda, Lavin e Susch,

era Cuttüra en il Paznaun. Reformaziun 1538. Reconstrucziun da la baselgia 1576–77. Il 1622 han ils Austriacs destrui la vischnanca d'Ardez. Il 1652 è ella sa cumprada libra da l'Austria ed ha furmà dapi il 1854 in'atgna vischnanca politica. Ils abitants d'Ardez vivevan da l'agricultura e da l'allevament da muvel. Els han colonisà las pastgiras a Cuttüra da l'autra vart dal Pass Futschöl ed han exportà laina en il Tirol fin ca. l'onn 1850. Disputas regularas cun Ftan pervi dal cunfin en la Val Tasna e cun Tarasp pervi da la punt sur l'En. Il 1913 ha Ardez survegnì ina staziun da viafier, il 1978 in sviamment. Arrundaziun dal terren a partir dal 1939. La vischnanca cumpacta e per gronda part intacta è vegnida elegida il 1975 sco ina da las quatter vischnancas exemplaricas da la Svizra en il rom da l'Onn europeic da tgrira da monuments e da protecziun da la patria; dapi alura numerusas restauraziuns. Il 2005 lavuravan ca. 50 % da las persunas cun activitad da gudogn ad Ardez en il sectur terziar, il rest eran purs e mastergnants. Part da la populaziun da lingua rumantscha: 2000 73,8% / 88,8% (meglra lingua / tuttas indicaziuns). *Paul Eugen Grimm*

Steinsberg (Sasmunt)

Oriundamain il vast areal d'in chastè cun baselgia dal temp medieval tempriv, situà sin ina collina grippusa en il territori da la vischnanca d'Ardez. Il pitschen chastè dal 12avel tschientaner tardiv ha in plan orizzontal lunghent e cumpiglia ina tur principala da quatter plauns ed in mir da tschinta cun construcziuns internas (ercol cun latrina e.a.). Entrada al segund plaun da la vart meridiunala. Lautga da la vart dal nord. Il tetg è modern. Restanzas da la baselgia da S. Luzi sa chattan sin la terrassa al nord dal complex. Dal mir da tschinta exteriur existan mo paucs fastizs. Il chastè central è vegnì costruì probablmain a la fin dal 12avel tschientaner dals signurs von Frickingen. Il 1209 è passà il chastè tras cumpra a l'investgju da Cuiira; il 1348 è el vegnì impegnà als Plantas, il 1411 a Georg Scheck ed è restà en la famiglia Scheck – malgrà diversas contestaziuns – en fin il 1502. Destruì durant la Guerra svabaisa (1499) dals Austriacs, è il chastè vegnì bandunà en il 16avel tschientaner ed è alura i plaunsieu en muschna. Suentar diversas lavurs da mantegniment e da renovaziun tras la famiglia possessura von Planta è la tur vegnida averta al public il 2001. *Maria-Letizia Boscardin*

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.